

# 3 JON

## JON PILIWUTA KUVUK WAN PAS

---

### TAK MBUTNDA NYAANGITNA

<sup>1</sup>Wun njambwi nyan wun. Gaias kat wan pas piliwutigowun. Min kat nimamba yelavika ligowun.

<sup>2</sup>Wuna nyan, min kat yelogwen mbak vitandi apma vak yetigiyamin wa wowun. Mina maawut apma vat tigandi. Viligowun. <sup>3</sup>Min God waa apma nyaangitmba wuka yetiligamin. minagwi kita mbaapmamba la nimba wun kat yalaa apma vat yetima vat kat wun kat mbutndi. Wanja nyaangit wutaa min kat nolin ngwandiga solat siligowun. <sup>4</sup>Mina wuna nyan vla ligamin. Wungi kat tiga God wa nyaangitmba yiga yetimangat wutaa nolin ngwandiga solat siligowun. Nat nda ana wuna maawut kwukiyandi. kwutndi, solat siga nolin ngwandigiyowun.

### GAIAS NAT NIMBA KAT KWUNATIGA NYANA

<sup>5</sup>Wuna nyan. Jisasna mbaapma nimba kat kwunatima vat apma vatna. Jisasna mbaapmamba la nimba tat vilapman nimba kat kwunatima vat apma vatna. Apma vat yima vak kat God ngini awat min kat kwigiyand. <sup>6</sup>Kwunapma nimba kumba yalaa Jisasna mbaapma nimba kat yima vak kat mbutndi. Ndi Godna njivwa kwutiga nimba ndi. Ngi kat tiga yinjeya yambi kwunapmeyan wovuna. <sup>7</sup>Godna njivwa kwupmat yindi. Godna nyangit mbutinja nimbananamba wenga ana klalindi. <sup>8</sup>Ngi kat tiga ndi kat kwunak kiyanin. Ndi kat kwunatneyan wan apma nyaangit mbutnjeya njivwa kita vat kwutigiyandin.

### DAIOTREFIS KAI WALIGA NYANA

<sup>9</sup>Minai liga Godna yelangi nimba kat tat nat nyaangit piliwutwun. Ngwula kita nyan Daiotrefis mbukwa nyaangik kat kaiwandi. Ndi wan

mbaapma nimbana njambwi nyanat tivat wandi. Njambwi nyan tiwa vat ana viga ligandi. <sup>10</sup>Ngwuk kat yaweyan ndinai yiliga kavle vak aywaa mbukiyowun. Wun kat kavle vat kwo ngambuligandi. Ndina kavle vat yetilinda vak wata ligandi. Jisasna mbaapma nimba ngwuk kat yindi maa ndi kat yagwa waa ana waligandi. Yagwa waa wagia nimba kat ke yagwa waa waligandi. Ndi kat kai waa kikliligandi.

#### DEMITRIAS APMA VAT TIGA NYANA

<sup>11</sup>Wuna nyan, ndi kavle vak yinda vla ke yiga. Apma vat mina yiga yeti. Apma vat yiga yetiliga nyan ndi Godna nyana. Kavle vat yiga yetiliga nyan God kat ana viga ligandi.

<sup>12</sup>Ngwula kita nyan Demitrias ndi apma nyana. Ndi aywaa waligandi. Ndi apma nyana waa waligandi. Wun wuno apma nyana waa waligowun. Wun woseka waliga nyan ana wun. Viligangwuk.

#### NGINI MBUTNDA NYAANGITNA

<sup>13</sup>Wun ngwuk kat piliwukweyan nyaangit nima sakwatno ligowun. Pensilmba piliwupmak kat kai wowun. <sup>14</sup>Ngwuk kat vilaa awat sowat ngambugiyanin.

<sup>15</sup>Min apma vat yeti mila. Wunagwinala liga mina ava nimba apma nandinya waligandi min kat. Minagwinala liga wuna ava nimba kat ndi kat apma nandinya awamba.